



宜蘭冬山定安宮

2009年6月28日，歲次己丑年閏五月初六，這日對新竹六家大夫第林姓宗族來講係隻當特別个日仔。因為，宜蘭縣冬山鄉定安宮个開基天上聖母摺先賢公(冬山鄉民尊稱林國寶為先賢公)个祿位第一擺轉到六家大夫第家祠，這擺个進香離林國寶去冬山開墾差毋多有兩百年咧！

1810年(清嘉慶十五年)，竹北六張犁(「六家」个舊地名)林屋得著機會，想愛摺開墾六張犁地區个成功經驗帶過去臺灣東片个宜蘭冬瓜山(「冬山」个舊地名)，由林先坤个三子林國寶領頭，召集族人向噶瑪蘭出發。面對生疏个未來，林屋人恭請媽祖婆隨行，希望做得安定大家个心，保佑事業平安順利。媽祖婆林默娘係林屋人个重要信仰，大體六家林姓宗親个屋下就有拜媽祖婆。因為林默娘無嫁，林屋人就喊佢安到「老姑婆」，將老姑婆暱做自家屋下个祖先樣，所以，林屋人摺屋下个媽祖婆共下從廣東饒平渡海來到臺灣，落腳新開墾个埔地，當然也共下從竹北六張犁去到冬瓜山。

林國寶入墾冬瓜山後，摺林秀春合作開「林寶春圳」，作武荖坑个水來蔭田。背尾，林國寶个俵仔林秋華加買條水路，用林先坤派下个公號做名安到「林吉記圳」。林屋人在這隻地區有較完整个水權後，發揮「開圳蔭水」个專長，拓墾出大片个靚田。照理講，大好个光景就等大家來收成，毋過，世事難料，林屋在冬瓜山个發展並毋係恁順利。摺其他人个衝突不時發生，包尾，無奈何，就將田地摺水圳連連續續賣分板橋林屋，族人也接等離開此地，遷徙到臺北、抑係其它所在發展。六張犁林屋在冬瓜山个開墾前後維持七十零年定定。

六張犁林屋退出冬瓜山後，地方人士並無毋記得林國寶對開莊个貢獻，還提錢改建林屋供奉媽祖婆摺林國寶祿位个「聖母祠」。到1959年，重新改建，換名「定安宮」，又經過兩擺修整，正有這下个規模。定安宮在冬山鄉街路个路尾，正廳主祀媽祖婆，虎廂奉祀「誥贈奉直大夫肇基墾主林府國寶字慶應號體玉祿位」，龍片廟壁鑲有碑石，刻等定安宮个沿革。這可能係除忒「林寶春圳」摺「林吉記圳」兩條水圳以外，還做得暱著六家林屋來到冬山開墾个歷史現場。

2010年9月18日，林先坤派下裔孫包等兩輛遊覽車，共下來到定安宮參加冬山開發二百週年个紀念活動。新竹六家林屋摺宜蘭冬山定安宮之間，經過這兩年个交流，兩地个關係總算再過串起來，大家也更加欽服先輩開山打林、追求新生活个冒險精神。

作者：林伯殷

☆詞彙學習☆

【祿位】lug` vui`：牌位。

【背尾】boi` mui`：後來。

【東片】dung` pien`：東邊。

【靚田】ziang` tien`：肥沃的農田。

【生疏】sang` so`：陌生。

【定定】tin` tin`：而已。

【大體】tai` ti`：大多。

【提錢】ti` cien`：募款。

【蔭田】rhim` tien`：灌溉農田。